





# 讀史記十表

清汪越撰徐克范補

開明書店製版

梅子方臥病坐吉山中得汪子師退所纂讀史記十表而霍然興也夫史者經之翼太史公史記撥拾于亡秦煨燼之餘欲以上繼刪述其義例皆特創爲歷代史書所宗其世家列傳以及八書或以國以人以事既各自爲首尾而挈其要於本紀又復爲十表以經緯之然後數千百年之平陂得失如指諸掌顧後之作史者多缺表何也才有短長亦不能如司馬氏之父子相繼積歲網羅參互以定其指歸故所記注者雖只一代而不能表其年月然則十表者豈非太史公作書精意所存哉而經生家之讀史記或取其筆墨之高古以爲程度或徵其事實之詳覈以資辯議至于諸表各有小序讀者未嘗不愛其文辭而表中所列之經緯次第初無寓目焉者蓋有之矣又何暇深加討論乎汪子此編能一一爲之疏剔使史記百三十篇之大義微旨皆炳然躍然於諸表之中可謂好學深思而心知其意者也其自小司馬而下以及宋明近代諸儒之所注釋譏評皆博蒐彙列而平懷以折其衷不爲激論高言以吹索瑕疵亦不爲曲說苟同以巧相傳會談言微中要歸於理汪子經術之湛深不於茲見一斑乎余爲之反覆尋繹輒然有當於心謂其可以爲讀書者法也因爲之書其後

尚書稱元祀十有二月乙丑惟十有三年春大會于孟津紀年之法肇此矣孔子因史文次春秋紀元年二百四十二年間積二千九百九十三年天道昭然人事概舉爲萬世史法之祖三代以下其有稽歷譜牒指陳時政以紀年法尚書春秋遺意者其在司馬太史史記年月十表乎後世讀史者於十表不甚省覽即覽矣孰是鉤深索隱心解神悟多所證發者大約以十表空格遡闡文義錯綜不耐尋討亦古今才學人之通病也春穀汪君師退沈酣於史漢諸書就史表釐其所得哀爲一編宛陵梅先生已爲之序猶嘆然不自許致書余家弟堯民翼得一是正可否而堯民果出其平日所得者補之剖其義類考厥異同薈萃羣書發揚疑意真可並駕齊驅行遠合轍者嘗竊綜十表論之敍三代必始黃帝何也孝武帝嘗曰吾誠得如黃帝吾視去妻子如脫屣耳史公于封禪一書特載其至黃帝之冢而祭之則自黃帝而後三世而顯項四世而帝偕夫且而唐而虞而夏而商而周也此史公微意也十二諸侯者首冠以周不直曰宣王元年而曰共和是時厲王雖流尚在處故不得即書宣王共和內諸侯也則亦序王人於諸侯之上也始是而訖於孔子是猶終於獲麟之義也篇言十二實敍十三者或以爲賤吳不數非也秦自襄公盡有西周之地卒并天下不得終列於諸侯

亦猶秦魏韓趙楚燕齊七雄虢閻分裂中夏而但繫之以六國六國具爲秦并故因秦紀踵春秋之後始周元王訖秦二世也至若秦楚之際世更運促陳涉起陳凡六月武臣起趙凡四月皆繫以月而不年是非而其中有四十八月三十八月者何以不年其時統無所屬不得以正元起數則直曰一月二月云耳按古公減鼎銘云惟十有四月戊命尊云九月管子書云二十四月二十八月書法古有是例不始龍門乎漢興以來同姓爲王者九國代最先次齊趙淮南次楚燕梁次荆次淮陽不數吳者吳最後以荆絕乃封也其後分王支庶凡百餘國疆幹弱枝之勢成而異姓擅權竊奪亦卽由是起矣高祖功臣天下初定唯十八侯至陳平終竟列侯第錄百四十三人觀所以得尊寵廢辱者是亦考鏡得失之林也孝惠孝景歷載五十諸呂構禍吳楚連兵欲盡令忠如長沙著爲令甲往往難之建元以來封爵凡七十二國自周子南君平津牧丘而外樂通以方術餘皆多起於邊境征伐所由與漢初功臣異矣歷元光抵太初王子侯者百六十有二而坐酎金國除者五十有八太史公曰盛哉天子之德一人有慶兆民賴之其果爲稱頌不衰者耶將相名臣表首以大事爲主而有相位者位當爲立周禮小宗伯之職掌建邦之神位鄭康成注曰故書位作立鄭司農立讀爲位

古者位立同字古文春秋公即位爲公即立是相

位卽爰立作相之說也高后八年七月辛巳食其

爲太傅九月丙戌復爲丞相以長曆推之八年七

月不得有辛巳九月不得有丙戌次日將相周勃

以太尉爲相太尉亞夫爲丞相並書於是故直曰

將相或又曰相當爲位凡此隨事逐書零落布散

不啻如斷爛朝報非實有殫精畢慮鎔鑄經史者

惡觀其讀而能疑疑而復補也哉且史記一書非

盡皆史公之本文也史公記事訖於天漢自是以

後卽褚少孫所補也又案成帝時長安人馮商待

詔金馬門受詔續太史公書十餘篇後漢楊終受

詔刪太史公書爲十餘萬言從是觀之史記一書

其有得免割裂譌缺者亦已少矣堯民著述等身

慨然以考訂自任行將大抒其所蘊備問史館爲

石室蘭臺之望今乃於讀十表而補之疑之抑猶

是膏之殘而覆之臍也然而缺者補誤者刊疑者

析實有發前人所未發者其取義精矣其用心可

謂勤矣亦可以謝師退是正之請已自是史記一

書紀年紀月不媿爲尙書春秋嫡系卽十表空格

遼闊微言大義俾人人皆了然於心口問者未必

非堯民所證發之力也余家自史記音義而外復

有是書是殆於史記均有補天浴日之功者與

雍正元年夏六月當塗文靖位山序

讀史記十表目錄

卷之一

讀三代世表

卷之二

讀十二諸侯年表

卷之三

讀六國年表

卷之四

讀秦楚之際月表

卷之五

讀漢興以來諸侯年表

卷之六

讀高祖功臣侯者年表

卷之七

讀惠景間侯者年表

卷之八

讀建元以來侯者年表

卷之九

讀建元以來王子侯者年表

卷之十

讀漢興以來將相名臣年表

太史公自序曰孔子作春秋學者至今則之自獲

麟以來四百餘歲而諸侯相兼史記放絕漢興百

年之間天下遺文古事靡不畢集太史公衛宏漢儀

註太史公武帝置天下計書先上太史公副上丞相璫曰百官

表無太史公司馬貞曰公者遷所著書尊其父云公也按遷序

中亦自稱太史公非但尊其父也 太史公仍父子相續

纂其職 譏卒三年遷爲太史令五年而當太初元年七年而

太史公遭李陵之禍 網羅天下放失舊聞王述所興

原始察終見盛觀衰論考之行事略推三代錄秦

漢上記軒轅下至于茲著十二本紀既科條之矣

並時異世年差不明作十表 顏師古云並時異世則年

歷差殊難以明辯故作表也正義云起黃帝訖天漢四年合二

千四百一十三年

維三代尙矣年紀不可考蓋取之譜牒舊聞本于

茲于是略推作三代世表第一

幽厲之後周室衰微諸侯專政春秋有所不紀而

譜牒經略五霸更盛衰欲觀周世相先後之意作

十二諸侯年表第二

春秋之後陪臣秉政疆國相王以至于秦卒并諸

夏滅封地擅其號作六國年表第三

秦既暴虐楚人發難項氏遂亂漢乃扶義征伐八

年之間天下三嬗事繁變衆故詳著秦楚之際月

表第四

漢興以來至于太初百年諸侯廢立分削譜紀不

明有司靡踵疆弱之原云以世正義云譜紀不明故有

司無所踵繼其後強弱之原乃云以世相代都不能有所錄記

也按云字疑亡字之訛見亡以論其世也作漢興以來諸

侯年表第五

維高祖元功輔臣股肱剖符而爵澤流苗裔忘其昭穆或殺身殞國作高祖功臣侯者年表第六惠景之間維申功臣宗屬爵邑作惠景間侯者年表第七

北討強胡南誅勁越征伐夷蠻武功爰列作建元以來侯者年表第八

諸侯既疆七國爲從子弟衆多無爵封邑推恩行義其勢銷弱歸德京師作王子侯者年表第九國有賢相良將民之師表也維見漢興以來將相名臣年表賢者記其治不賢者彰其事作漢興以來將相名臣年表第十

按太史公自序在史記篇末其歷序所以著本紀世家書表傳之意是一片文字不可割截茲所剽取特以其辭簡明使讀者觀其持論大旨耳至每表之前各自有序惟將相名臣闕此固具載全表也

司馬貞曰應劭云表者錄其事而見之按禮有表記鄭玄云表明也謂事微而不著者須表以明之故曰表也

張守節曰表分代系年封又云作表十象天之剛柔十日也

鄭樵曰史記一書分爲五體本紀紀年世家傳代表以正曆書以類事傳以著人

林駟曰嘗觀遷史之表矣三代世表所以觀百世之本支也考黃帝之初先列諸系以祖宗爲經以子孫爲緯則五帝三王皆出于黃帝此帝王授受之正統可見也六國年表所以示天下之名分故齊康公之十九年爲田和遷居海上而書曰齊太

公卒田和亦稱太公且繫之康公二十年康公既卒始書田齊此尊卑逆順之正理可見矣十二諸侯年表以下以地爲主故年經而國緯所以觀天下之大勢也功臣年表以下以時爲主故國經而年緯所以觀一時之得失也秦楚月表上尊義帝而漢居其中明大義也將相年表上繫大事記明職分也凡表縱者爲經衡者爲緯

王應麟曰班固謂司馬遷史記十篇有錄無書顏師古以爲十篇具在或草具而未成也漢興以來將相年表其書具在但闕前序按自序云凡百三十篇五十二萬六千五百字則當日全書已成或後散失故闕十篇耳

按表者紀月編年聚而爲繪圖指掌經緯縱橫有倫有脊其書法謹嚴幾於春秋大義數千炳若日星矣至所不言尤寓褒譏未易測識後人欲穿鑿立論復所未安誠會本紀世家列傳窮厥事理當自得之也

讀史記十表卷之一

三代世表第一

〔黃帝〕〔僭屬〕黃帝生玄囂○按玄囂卽少昊

金天氏

〔帝僭〕〔僭屬〕高辛生帝僭○按高辛卽僭此

誤

〔帝杼〕帝杼○按舊本作子系本作佇左國作杼

〔帝中丁〕俗作仲丁

〔昭王瑕〕〔曹〕太伯○按名牌振鐸子

按舊本此後載褚先生語一段援殷周以稱霍將軍又謂堯知后稷子孫之後王故益封之百里索隱云褚先生蓋腐儒也言之不經蕪穢正史又按索隱各表述贊文義亦淺故皆不錄

讀三代世表

讀三代世表以黃帝爲主於顓頊屬僭堯屬舜屬於夏屬殷屬周屬皆曰黃帝生又曰起黃帝至顓頊三世起黃帝至帝僭四世起黃帝至僭子帝堯五世黃帝玄孫之玄孫虞舜明諸帝皆黃帝後也於夏殷周曰從禹至桀十七世曰從黃帝至桀二十世從湯至紂二十九世曰從黃帝至紂四十六世周武王伐殷曰從黃帝至武王十九世明三代皆黃帝後也此必古譜牒如帝繫姓本有成文而史公據之以作表也世表者但次其世不可以紀年故也序言孔子次春秋則紀元年正時日月序尚書則弗論次其年月蓋可詳者詳之不可詳者慎之故但據繫牒尚書作世表亦慎而闕疑之意也

索隱曰三代皆出自五帝故序三代要自五帝而起首也

表起于五帝而但曰三代世表何也正義云五帝久古傳記少見夏殷以來乃有尙書略有年月比于五帝事跡易明故也索隱云三代之系長遠宜以名篇似正義說是也

索隱曰太史公作史記宜應自上開闢下迄當代以爲一家之首尾三皇以還載籍罕備然君臣之始教化之先既論古史不合全闕近代皇甫謐作帝王世紀徐整作三五曆皆論三皇已來事併採而補之

按司馬貞補三皇本紀以伏羲女媧皆蛇身人首神農人身牛首以至煉石斷鱉之誕皆筆之又推之開闢之初天地人三皇以爲圖緯所載不可全棄又推人皇已後五龍氏以下十七君又引韓詩以爲自古封太山禪梁甫者萬有餘家又稱自開闢至于獲麟凡三百二十七萬六千歲分爲十紀其可信乎太史公託始黃帝而其間猶不免牴牾況欲論著開闢以降乎故曰百家言黃帝其言不雅馴薦紳先生難言之乃知其澄汰者已多矣

蘇轍曰司馬遷紀五帝遺義農而黜少昊後世皆以爲非

按司馬貞補伏羲女媧神農而後及黃帝蘇轍作古史去女媧進黃帝爲三皇以少昊顓頊帝偁堯舜爲五帝蘇勝于小司馬矣

柯維騏曰五帝之名見于孔子家語及大戴禮其說有二其一孔子答季康子以伏羲配木神農配

火少昊配金顓頊配水此言數聖人革命改號取法于五行之帝非五帝之定名也其一則孔子所答宰我五帝德曰黃帝曰顓頊曰帝嚳曰堯曰舜太史公所述五帝紀是也見五帝本紀贊中厥後皇甫謐作帝王世紀蘇子由作古史鄭樵作通志並祖孔安國以伏羲神農黃帝爲三皇少昊顓頊帝嚳堯舜爲五帝五峯雙湖胡氏又主秦博士天皇地皇人皇之議而以伏羲神農黃帝堯舜爲五帝主易繫詞道原劉氏遂以爲定論竊謂皆不如太史公之說爲有徵也

楊慎曰譙周古史以炎帝與神農各爲一人羅泌路史以軒轅與黃帝非是一帝史皇與蒼頡乃一君一臣共工氏或以爲帝或以爲伯而不王祝融氏或以爲臣或以爲火德之主古云三皇之事若存若亡五帝之事若覺若夢蓋洪荒之世存而不論可也

索隱曰漢書顓頊五世而生絳此及帝系皆云顓頊生絳是古史闕其代系也

歐陽修曰遷所作本紀出于大戴禮世本諸書今依其說圖而考之堯舜夏商周皆出黃帝堯之崩也下傳其四世孫舜舜之崩也復上傳其四世祖禹皆壽百歲稷契于高辛爲子乃同父異母之兄弟而以世次而下之湯與王季同世湯下傳十六世爲紂王季下傳一世爲文王二世爲武王豈不謬哉

按索隱五帝譜系圖契十四世至湯稷二十餘世至文王蓋得其實矣又按表舜禹之世次亦有可疑者黃帝生昌意

昌意生顓頊顓頊生窮蟬窮蟬生敬康敬康生句望句望生蟠牛蟠牛生瞽瞍瞽瞍生帝舜世數何多黃帝生昌意昌意生顓頊顓頊生絳絳生文命是爲禹世數何少宜歐陽子深非之也惟堯之世次與禹合蓋皆四世而舜更中歷四世始與堯同時必有牴牾然此亦何足爲太史公病哉唐應德言秦興滅學而宗譜不立及漢司馬遷修史記上述黃帝下迄麟止據世本世系而作帝紀採周譜國語而作世家由是人乃知姓氏之所出然則掇拾于煨燼之餘亦未可訾其鄙陋而不學疎略而輕信也

自成王誦至厲王胡帝王世也至共和而訖下列諸侯凡十一國初封而後各有世數亦至共和而訖然不冠于十二諸侯年表之前而綴于三代世表之末何也明諸侯亦皆黃帝後也魯衛燕晉蔡周之同姓宋殷後陳舜後齊爲四岳伯夷之裔秦之先帝顓頊之苗裔楚之祖亦出顓頊本紀云黃帝二十五子其得姓者十四人是以前見三代世表也

#### 讀三代世表補

世表惟名三代不言五帝者索隱謂三代之系長正義謂五帝傳記少見皆非也夏爲顓頊後商周爲帝偁後同出黃帝則黃帝顓頊帝偁即表于三代堯授舜舜授禹無帝系可表故不得不兼言五帝世表也

夏商表至桀紂訖周表不訖赧王訖于共和者太史公云周自厲王始亂共和行政此後以彊乘弱與師不請天子則是時天下大勢在諸侯



不在王室宣王中興之業雖見于詩事攻吉日諸章據小序祈父白句黃鳥行野諸篇則皆爲刺宣王之詩而國語所載不藉千畝敗績姜戎建少奪長諸侯不睦料民太原卒及幽王乃廢滅則時事亦可知矣年表雖冠周于上實以諸侯爲主故不復曰周世表但曰十二諸侯年表六國年表而已

夏表書帝啓作甘誓見世變也征苗之誓惟曰一乃心力其克有勳甘誓則曰不用命殄戮汝故君子謂讀甘誓知唐虞之風微商周之運至矣

羿浞篡立不書削也索隱曰帝相既逐中間歷羿浞二氏凡三四十一年而史表不載本紀直云帝相崩子少康立疎略之甚按史之所以不載者初帝相尚在灌鄩繼則少康生于有仍故直削之但夏本紀亦當敘其事不應全闕徐孚遠云史遷時左傳未顯不知羿浞事此或然也商表書伊尹卒書得傳說特筆也

表于五帝三王不繫一事獨文王書益易卦特筆也

### 存疑

周懿王表云周道衰詩人作刺周本紀同十二諸侯年表序亦云周道闕仁義陵遲鹿鳴刺焉按詩小序王風皆東遷後刺平王及桓王莊王之詩小雅有刺幽王之詩大雅有刺厲王及幽王之詩並未云刺懿王即鹿鳴小序亦謂燕羣臣嘉賓之詩非刺也未審何據當日詩不一家或別有本耶

宋表潞公丁公弟按宋世家潞公丁公子家語本姓解亦云丁公申生潞公其弟字疑誤衛表孝公一本作孝伯按衛世家康伯卒子考伯立古史考亦云考伯孝字疑誤

### 讀史記十表卷之二

#### 十二諸侯年表第二

〔序〕上大夫董仲舒推春秋義頗著文焉○徐孚遠曰惟董生所作推明春秋之指其餘雖沿其名自別記事不屬春秋也

〔周平王十七年〕〔陳〕陳文公圉元年生桓公鮑厲公他他母蔡女○按厲公名躍非他

〔周莊王元年〕〔鄭〕鄭昭公元年忽母鄧女祭仲取之○按取之爲公取之也

〔周莊王四年〕〔鄭〕鄭子嬰元年子廔之弟○按子嬰左作子儀

〔周釐王四年〕〔晉〕晉武公稱并晉已立二十八年不更元因其元年○按世家與曲沃通年卽位凡三十九年而卒此二十八年誤

〔周惠王二年〕〔蔡〕按哀侯留楚九年死〔周惠王十五年〕〔魯〕莊公弟叔牙鳩死子般季友奔陳立潞公○按子般下脫卒字

〔周襄王五年〕〔秦〕丕豹欲無與公不聽輸晉粟起雍至絳○按前脫晉饑請粟句

〔周定王二十年〕〔鄭〕晉欒書取我范○按范左作汜祭鄭二邑鄭無范地或汜字之誤

〔周靈王九年〕王叔奔晉○按王叔陳生與伯與爭政訟不勝王叔奔晉

〔周靈王十年〕〔秦〕我使庶長鮑伐晉救魏敗之櫟○按左云救鄭魏字誤

〔周景王二年〕〔鄭〕諸公子爭寵相殺子產子成止之○按左云又欲殺子產子皮止之脫又欲殺三字成字誤

〔周敬王二年〕〔鄭〕公如晉請內王○按諸本皆入燕表誤

讀十二諸侯年表

讀十二諸侯年表以周爲主

茅坤曰孔子作春秋而太史公得因之以表本末盛衰之迹也

索隱云篇言十二實敍十三者賤夷狄不數吳又霸在後故也不數吳而敍之者闔閭霸盟上國故也

蘇洵曰越不與中國會盟故不敍 有越世家而不列于表

按十二諸侯年表並與三代世表之末相接續魯始真公齊始武公晉始靖侯秦始秦仲楚始熊勇宋始釐公衛始釐侯陳始幽公蔡始武侯曹始夷伯燕始惠侯皆所謂自共和也三代世表下十二國無鄭者鄭至周宣王始封其母弟友也吳壽夢始見于周簡王元年冠周于上尊王室也書甲子于周之上紀天道也 共和元年庚申以後但書六甲表元年諸侯各以次相及詳曆數也書孔子生尊聖人也書孔子去留悼道之不行也書諸侯相侵伐明王室不能討也書篡逆罪無君也災異必書敬天也書會盟重息民且見夷夏之勢所由分也書殺逆臣明法也諸侯之事必舉其要謂春秋國語學者所譏盛衰大指也觀世家所載之詳乃知此表斷其義不騁其詞非獨具年月世譜而已蓋自厲而宜自幽而平周轍既東以及春秋二百四十年之大勢也

讀十二諸侯年表補

司馬貞謂篇言十二實敍十三者賤夷狄不數吳又霸在後故竊疑楚亦夷也何以數況吳又太伯後耶至于霸在後尤非十二國非皆霸者何論先後所疑者十二國始封皆列世表之下鄭以宣王始封紀年獨吳前既不列于世表而年表初亦不載何也謂吳壽夢始見春秋迺書夫春秋始平王四十九年前所書十二國初不以見于經也吳自太伯以後歷載世家又非不可詳敍而不數莫得其義或者舊譜十二不及吳史公以吳通中國會盟故敍之而數仍其舊耶表于日食災異必書謹天戒也書于魯表從魯史也外此惟三川震彗星入斗屬周梁山崩星出婺女屬晉彗星見屬齊屬秦隕石鷁飛熒惑守心屬宋于其境也盟會不書不勝書也有書者美惡之大者也戰伐圍取不書不勝書也有書者美惡之大者也周定王以後晉楚爭鄭屢書傷霸之衰楚之橫朝聘不書不勝書也魯公如晉如楚悉書傷不自立也于國君嗣位必詳表以紀年不詳則失也平王室成周城周必書尊王也滅國必書傷不祀也迎女送女娶夫人不悉書書者有爲也淫者必書淫則亂也

國內亂必紀本末重內治也

殺逐必紀本末正始也

重耳過諸國悉書有禮無禮者譏晉文之陋也秦書初立西時祠白帝懼始僭也

卿卒不書晉襄公六年書趙成子欒貞子霍伯白季皆卒明年書公卒傷賢臣亡霸業衰也至悼而復則書其言曰吾用魏絳九合諸侯

書齊景公與晏子狩入魯問禮賢晏子也故其事與言屢書

書子產爲卿賢子產也故其事與言屢書吳季子來魯及齊晉鄭皆書賢季子也于衛不書闕也

梁山崩表云伯宗隱其人而用其言譏伯宗也卒爲三郤殺故曰不祥之實蔽賢者當之也

宋表書以羊羹陷鄭鄭表書以鼃故殺君見飲食細節能召禍也

秦表書以盜食善馬士得破晉勸懲施也事變必書紀異也如生有髡殺人絳市被蘇手文爲魯夫人鄭姑賜蘭曹夢社宮之類

書伍子胥鞭平王墓譏已甚也 申包胥使人謂子胥曰子之報讎其已甚乎子胥曰吾日暮途遠故倒行而逆

施之或曰子復讐也公羊傳云父不受誅子復讐可也

衛武公晉文侯鄭武公之賢不一書凡見于詩書者皆弗表也

存疑

魯世家云懿公兄括之子伯御與魯人弑懿公而自立在位十一年宣王伐魯殺伯御立孝公

表不書伯御卽書魯孝公何也豈弑君者不得書乎春秋書者衆矣孝公實在位二十七年表紀三十八年似非實錄

周襄王元年齊率戎伐晉亂至高梁還此宜入齊表或晉表不當入魯表左傳云令不及魯故不書

齊表頃公十一年如晉欲王晉晉不敢受按春秋傳齊侯朝于晉將授玉杜氏註云凡諸侯相朝升堂授玉于兩楹之間索隱于齊世家引張衡之言謂諸侯朝天子執玉既授而反之諸侯自相朝則不授玉齊頃公授玉是欲尊晉爲王故史公探其言而書之按周禮典瑞公侯伯子男執圭璧以朝覲宗遇會同于王諸侯相見亦如之鄭司農云亦執圭璧以相見故郝隱公來朝執玉高魯定公受玉卑是諸侯相朝未嘗不授玉也安得據張衡之言遂云欲王晉耶且衡東漢人索隱亦失考

周靈王十七年諸侯同圍齊齊侯敗走入臨菑晏嬰止公公弗從晉焚郭中而去齊表云晉圍臨菑晏嬰大破之疑誤

晉表重耳聞管仲死去翟之齊晉文何畏管仲耶豈仲猶楚子玉輩耶不可解春秋國語晉世家俱未載此疑誤

楚武王五十一年表云王伐隨夫人心動王卒軍中按左傳楚武王入告夫人鄧曼曰余心蕩夫人曰王祿盡矣盈而蕩天之道也表語疑誤宋大水表云公自罪魯使臧文仲來弔按左傳文仲來弔宋對曰孤實不敬天降之災安得卽

書公自罪于來弔之前耶宋世家云魯使臧文仲來弔水公自罪曰云云較明

衛襄公九年表云夫人姜氏無子當有立賤妾子元爲嗣句以便下書衛靈公元年疑誤

蔡表東國殺平侯子而自立蔡悼侯東國元年奔楚按春秋魯昭公二十年蔡平侯卒太子朱

立楚費無極取貨于東國而謂蔡人曰將立東國不從必圍蔡蔡人懼出朱而立東國經書冬

蔡侯朱出奔楚是朱已成君未見殺也出奔者朱繫于東國元年下亦誤

鄭表云太子忽救齊齊將妻之當有忽辭二字疑闕

鄭表書渠彌殺昭公書齊殺子亶子嬰十四年亦當書甫瑕殺子嬰疑缺

鄭簡公十二年表子產爲卿聲公五年表子產卒按左傳子產卒于魯昭公二十年鄭定公之

八年也定公十六年卒獻公立獻公十三年卒聲公立是子產惟相簡定二君並未相獻聲也

後人云歷相四君襲史表世家之訛

宋武公十八年書生魯桓公母鄭莊公元年書祭仲生齊僖公元年書同母弟夷仲生陳厲公

二年書生敬仲完其他不書獨書此數人者疑亦舊冊所有筆削未淨耳如謂義所在春秋可

勝書耶惟魯襄公二十二年書孔子生乃尊聖之辭爲不同耳

表中有撮敘一二語多簡而未明疑有脫誤如齊表彗星見晏子曰田氏有德于齊可畏宋表焚惑守心子章曰善鄭表子產曰三國不會之類

### 讀史記十表卷之三

#### 六國表第三

〔周元王七年〕〔趙〕衛莊公飲大夫不解履公怒卽攻公公奔宋○按此當入魏表詳存疑

〔周定王十四年〕〔魏〕衛悼公黔元年○按悼公蒯瞶庶弟輒季父也

〔周定王十九年〕〔魏〕衛敬公元年○按敬公名弗悼公子

〔周考王四年〕〔魏〕晉幽公柳元年服韓魏○按世家云反朝韓趙魏之君

〔周考王十年〕〔魏〕衛昭公元年○按昭公名糾敬公子

〔周考王十三年〕〔楚〕魯元公元年○按元公名嘉

〔周威烈王元年〕〔魏〕衛悼公亶元年○按世家公子亶弑昭公代立是爲懷公悼字疑誤

〔周威烈王六年〕〔魏〕魏誅晉幽公立其弟止○按世家止幽公子按殿本史記作盜殺晉幽公

〔周威烈王十二年〕〔魏〕衛慎公元年○按慎公名頽弑懷公代立

〔周威烈王十二年〕〔趙〕中山武公初立○索隱曰中山古鮮虞國虞姓也系本云中山武公居顧桓公徙靈壽爲趙武靈王所滅不言誰之子孫

〔周威烈王十四年〕〔齊〕伐魯莒及安陽○按莒世家作葛

〔周威烈王十九年〕〔楚〕魯穆公元年○按穆公名顯



〔周安王元年〕〔魏〕 秦伐至陽狐○按諸本作伐秦誤

〔周安王元年〕〔楚〕 楚悼王類元年○按世家名熊疑

〔周安王二年〕〔魏〕 太子營生○按懿武侯子

〔周安王十三年〕〔秦〕 太子生○按本紀子出生子

〔周顯王十六年〕〔齊〕 敗魏桂陵○是年齊稱王

〔周顯王三十一年〕〔秦〕 秦大荔圍合陽孝公薨商君反死彤地○按列傳云殺之于鄭黽池

〔周顯王四十四年〕〔秦〕 四月戊午魏君爲王○按魏君字誤詳存疑

〔周顯王四十四年〕〔趙〕 魏敗我趙護○按此事趙魏世家皆無

讀六國表

讀六國表以秦爲主周之後漢之先序所謂因秦紀踵春秋後表六國時事是也

冠周于上周雖衰未亡也至赧王五十九年卒而絕不卽予秦者秦未并天下也蓋闕不書王者三十三年 始皇二十八年六國皆滅乃書其年于上以代周

東周西周不書王以自貶爲君卑若縣鄙不成王也

周無事可書書齊威王朝周兩書賀秦書致胙于秦書諸侯會致伯秦秦代周之徵也書九鼎震亡徵也書王子定奔晉王室難也書東周惠公薨自貶也于秦表則書曰天子致胙曰天子

致伯曰諸侯畢賀曰會諸侯于澤朝天子曰天子賀曰天子致文武胙皆以傷王室而必正其名也曰取西周王曰呂不韋取東西周周始亡然不于周書者不予秦之滅周也

表秦詳于六國何也秦自爲一代之制故置官書爲賦書作上下時書塹河築城書爲縣書開阡陌書令吏帶劍爲縣有秩史書行錢書初臘書置丞相書初置三川郡書初置東郡書百姓納粟拜爵書天下大酺書俱在始皇并天下三十八年前蓋先王封建井田周官周禮已盡湮于是矣此太史公微意也

秦滅六國以六國自相滅也表于攻伐拔地納地助擊助滅俱詳載合觀之可以見秦并天下之大機焉

表魏則大書云孟子來特識也王問利對曰君不可言利載問答者爲戰國所無也前表文侯受經子夏同意

魏韓趙三國其始猶表晉晉未亡也晉定公卒其後出公哀公幽公皆表元年而無事可書政不在公室也趙襄子與知伯分范中行又與魏桓子韓康子敗知伯于晉陽三分其地蓋周定王之五十六年事而晉則爲哀公時也至周威烈王二年魏文侯斯元年韓武子元年 子景侯 趙襄子卒弟子嘉立爲趙桓子元年卒明年國人立襄子子晚是爲獻侯于是三國皆紀年而晉無年表魏文侯五年誅晉幽公立其弟止爲晉烈公亦無年表至周威烈王二十三年

魏韓趙初列爲諸侯而晉卑矣然晉猶表孝公

傾元年又表靜公元年至周安王之二十六年

魏韓趙滅晉分晉國晉絕無後然後晉乃亡

齊始平公五年至二十五年宣公立五十二年

康公立十九年政皆在田氏也田和始列爲諸侯遷康公海上食一城事在周安王之十六年

又六年康公卒田氏遂并齊而有之太公望之後絕祀而威王始以齊強天下又三年而三晉亦滅其君分晉國先是齊桓公十四年陳完自陳來奔田氏始此也晉景公十二年始置六卿後齊政歸田氏晉六卿強誅公族分其邑各使其子爲大夫晏嬰叔向嘗相與語嬰曰齊政歸田氏叔向曰晉公室卑此所謂履霜堅冰至國之大戒也

六國附見之小國凡十秦表之有蜀義渠也魏表之有衛也韓表之有鄭也趙表之有代也有中山也楚表之有魯也有蔡也莒也齊表之有宋也太史公紀其君多爲書元年何也蜀義渠僻在庸蜀邊鄙小邑莒代亦微而魯宋鄭衛春秋時爲上國蔡爲周親中山又周公之孫西周桓公之子皆枝梧延息于諸雄之側至秦滅蜀義渠韓滅鄭趙與齊燕共滅中山楚滅魯滅莒滅蔡齊滅宋惟魏屢加兵于衛而衛君角至秦二世乃廢爲庶人故表于此皆不沒其年而附著之猶之皋陶庭堅不祀忽諸之慨嘆也昔周之封君蓋八百矣而強侵弱衆凌寡遂至爲六國一折而晉入秦此戰國二百九十年之大勢也

讀六國表補

讀六國表補

讀六國表見當日諸侯戰秦者不過洩一朝之忿媚秦者第以偷旦夕之安未見有能自強爲天吏者觀漢高祖約法三章天下歸心則孟子仁者無敵之言實可見諸事效非迂闊也論者不探其本徒咎六國之不能合力以拒秦于當日事理事情勢均未之得也

周威烈王二十三年九鼎震是年始命韓趙魏爲諸侯晉三分而秦無敵矣故周亡微于此也周表書齊威王朝周非美威王傷周也故不入齊表

周顯王二十六年致伯秦二十七年秦朝周獨書致伯不書朝周者以空名無救于亡也詳書秦表者權在秦也

秦表屢書來賂見秦之好貨邦交之以利也秦表屢書斬首數萬至數十萬見秦以嗜殺并天下宜乎祚之不永也

日蝕災異不書于周書于秦表者非獨見于秦分也以周不足係天下之存亡亦無與天戒云耳

書五國共擊秦不勝而還繼書齊敗魏趙觀津罪齊也

秦嗣君生或書或不書何也有故則書無則否書生靈公書生獻公書惠公太子生書孝公生

本紀載孝公之言曰往者厲躁簡公出子之不寧國家內憂未遑外事諸侯卑秦醜莫大焉故書此見內亂也秦至孝公用商鞅始大

秦昭王二年魏表書秦武王后來歸不書秦表何也后無罪不與昭襄之出也本紀云武王取

魏女爲后無子立異母弟是爲昭襄王卽位二年庶長與大臣諸侯公子爲逆皆誅及惠文后皆不得良死悼武王后出歸魏云及云皆不得良死刑亦濫矣云出歸情亦忍矣故後書宣太后薨譏昭襄之知有母而棄其君母也

后薨不悉書始皇七年書夏太后薨明其所自出夏太后莊襄王母書華陽太后薨明其所從立莊襄以華陽故得立

遷而復也十年書太后入咸陽此外無書后薨者秦靈公八年書初以君主妻河爲後世教邪之始

秦惠文王書初更元年爲後世改元之始秦始皇四年書納粟拜爵爲後世嚮爵之始

於魏書孟子來于齊不書何也聖賢道既不行特一表焉不悉也

魏哀王六年書秦來立公子政爲太子譏魏之制於人也

魏昭王六年書芒卯以詐見重譏使詐也韓表書昭侯不出高門見不善之可前知也

魏獻子韓宣子皆不紀年獨趙襄子紀年何也與智伯分范中行地與韓魏分智伯地豈皆由趙氏地分而晉亡矣故獨入趙表紀年以著之言與者罪襄子也

趙悼襄王齊王建入秦置酒無恥也趙八年入秦九年秦即取趙九城書此見媚人之無益也

趙表書烈侯欲賜飲者田徐越侍以仁義乃止見陳善之能閉邪也

趙武靈王五年書取韓女爲夫人十六年書吳

廣入女生子何立爲惠后二十五年書惠后卒獨詳何也按世家武靈十六年夢見處女鼓琴而歌數言其狀吳廣聞之因納其女娃嬴有寵生子何二十七年乃廢太子章立何爲王傳國吳娃死愛弛憐故太子欲兩王之猶豫未決亂起武靈餓死書此見立寵奪嫡爲亂之本而猶豫更足以召禍也且亦有命焉初簡子夢之帝所有曰余思虞舜之勳將以其胃女孟姚配而七世之孫吳娃孟姚也武靈簡子七世孫也以簡子之夢合武靈之夢數之前定如此夫

蘇秦說六國獨入燕表何也以燕之亡國所由也

三晉滅其君獨入齊表何也傷齊晉之同絕也齊康公表載二十六年按田世家云康公十九年田和立爲齊侯稱元年二年和卒子桓公午

立六年卒子威王因齊立則康公既遷田氏已紀元矣而表猶紀康公之年追康公卒乃書威王元年此史公書法也爲後來綱目書漢昭烈

唐嗣聖之本秦表丞相悉書魏表書卜相書中山君爲相書

封無忌信陵君韓表書盜殺相使累書申不害相趙表書以公子勝爲相封平原君楚表書張儀來相書黃歇爲相齊表書以鄒忌爲成侯書

孟嘗君歸相齊凡此見相之重也秦表書樗里子擊蘭陽庶長章擊楚司馬錯誅

蜀任鄒守漢中白起擊伊闕擊楚擊魏破趙蒙武擊齊蒙鶩擊趙擊韓破魏王齕擊上黨桓齕

擊平陽內史勝取韓王翦拔趙破楚王賁虜魏

燕齊君魏表書齊殺將軍龐涓書秦虜公子印  
韓表書秦得將軍申差書虜將喜書敗暴爲趙  
表書秦敗將軍英書虜將趙莊書蘭相如攻齊  
書趙奢大敗秦書廉頗拒秦書趙括代頗白起  
破括四十萬書秦敗扈輒楚表書秦敗我將屈  
句書敗將軍唐昧書殺景闕書破我將項燕燕  
表書田單拔我中陽書趙破我殺栗腹書劇辛  
死于趙齊表書田忌田嬰田盼將孫子爲師書  
殺騎劫凡此見將之重也

取地與地必書見土地爲疆弱之由六國之割  
地請和者真失策也

書迎女逆婦書夫人來書取女爲夫人見姻好  
之邦干戈隨之和親之不足恃如此後之議以  
此和匈奴者愚甚也

書滅杞滅莒不敘其君之年杞世家有云微甚  
不足數也

秦昭王五十二年取西周王是年楚考烈王取  
魯秦莊襄王元年取東西周周絕是年楚滅魯  
魯絕周魯之相爲存亡如此也

諸侯僭稱王自楚外齊威王二十六年首稱王  
魏襄王元年與諸侯會徐州以相王秦惠文王  
十三年稱王韓宣惠十年稱王燕易王十年稱

王宋君偃十一年亦稱王中山亦稱王國策中山  
與燕趙爲王惟趙武靈王八年五國相王魏韓趙楚  
燕趙獨否曰無其實敢處其名乎令國人稱君

尋亦稱王未紀其年至秦昭王十九年十月爲  
西帝十二月復爲王齊湣王三十六年爲東帝  
二月復爲王無其實處其名何取乎爾吁周王

也後稱君衛侯也貶號曰君疆弱之勢至易名  
號可慨也

存疑

秦惠文王十三年四月戊午魏君爲王按周本  
紀及齊世家楚世家俱載秦惠王稱王在十三  
年而秦世家獨未載稱王事惟惠王四年言齊  
魏爲王十三年又言四月戊午魏君爲王韓亦  
爲王據此魏稱王既在惠王四年不應又在十  
三年韓是年亦未嘗稱王則秦世家與表俱有  
誤也還以周本紀齊楚世家謂是年秦初稱王  
爲是

魏韓趙始列爲諸侯宜入周表不應獨書楚表  
疑誤

晉世家云出公十七年智伯與魏韓趙共分范  
中行地以爲邑出公怒表載襄子四年與趙世  
家同按襄子四年乃晉哀公三年既非出公時  
表又但書與智伯分范中行地不及韓魏疑有  
誤

趙表載衛莊公飲大夫云云按左傳魯哀公二  
十五年衛侯爲靈臺于藉圃與諸大夫飲褚師  
轅而登席公怒因攻公公奔宋是出公事諸本  
皆作莊公誤且當附入魏表入趙表亦誤

越世家云楚威王大敗越殺王無疆盡取故吳  
地北破齊于徐州而越以此散楚表但載圍齊  
于徐州不書滅越疑闕

周赧王五十九年西周君奔秦盡獻其邑秦受  
獻歸其君于周周君王赧卒索隱正義皆謂西  
周君卽西周武公也通鑑綱目則書王入秦盡

獻其地歸而卒是西周君卽周赧王非西周武  
公按周自敬王遷都成周號東周至考王封弟

揭于河南都王城是爲河南桓公實西周之始  
時則東有王西有公而東西之名未立至桓公

孫惠公別封其少子班于鞏以奉王號東周惠  
公沒亦諡惠是則有東西二周公二公雖各有食

邑而周尙爲一顯王二年趙成侯與韓攻周分  
周以爲兩事載趙世家周本紀云王赧時東西

周分治王赧徙都西周則爲西周王或以其微  
弱亦稱西周君而索隱釋本紀周君王赧卒云

周君指武公此時與王赧皆卒故連言之于文  
義未安秦昭王五十二年表書取西周王明指

赧王莊襄元年表書取東西周明指二周公又  
周本紀云王赧卒周民東亡秦遷西周公于愚

狐後七歲秦莊襄王滅東西周東西周皆入于  
秦秦本紀則云東周君與諸侯謀秦秦使呂不

韋誅之盡入其國不絕其祀以陽人地賜周君  
是時西周公已遷愚狐見于周本紀故秦本紀

略之也且本紀載王赧徙都西周既云徙都必  
有國邑索隱寄居西周之說亦未當也

衛世家昭公時三晉強衛如小侯屬之正義曰  
屬趙按世家懷君三十一年朝魏魏殺懷君更

立其弟爲元君元君十四年秦拔魏東地東徙  
衛野王并濮陽爲東郡則衛屬魏不屬趙也故

附魏表鄭附韓中山附趙魯蔡附楚宋附齊皆  
爲所滅故也  
魏表衛出公二十一年衛悼公立衛世家同索  
隱曰出公初立十二年亡在外四年復入九年



是爲二十一年按左傳魯哀公十八年衛石圃逐其君起輒復歸哀公二十五年衛諸大夫攻公公出奔衛人立悼公輒遂卒于越則輒之復立僅八年年表世家皆誤索隱以初立十二年復入九年附會之尤誤

趙桓子元年索隱曰桓子嘉襄子弟也元年卒明年國人共立襄子子獻侯晚按趙世家襄子見伯魯之不立也伯魯襄子兄故太子廢必欲傳位伯魯子代成君成君死乃取成君子浣立爲太子襄子卒浣立是爲獻侯襄子弟桓子逐獻侯自立一年卒國人復迎立獻侯則獻侯襄子兄之孫索隱以爲襄子子誤矣晚一本作脫疑浣字之訛

趙表武靈王二十五年惠后卒趙世家索隱註云謂前太子章之母惠文王之嫡母也按此惠后卽吳娃惠文王之母故下文云吳娃死愛弛孝成二年惠文后卒乃惠文王之后孝成王之母所謂太后不肯以長安君爲質者也索隱誤以惠文后爲吳娃爲惠文王之母因以惠后爲惠文王之嫡母乃以下書吳娃死爲誤不亦疎乎

燕表君噲及相子之皆死徐廣註世家曰年表云君噲及太子相子之皆死索隱云年表誤今本俱無太子字將徐廣索隱所見之本不同耶書傳既久殘闕舛誤大率可見故信以傳信疑以存疑不得妄爲之說也

讀史記十表卷之四

秦楚之際月表第四

〔序〕五年之間號令三嬗○按五年指漢王始封及爲帝凡五年自序云八年則統二世三年言之

〔序〕末附○起秦二世元年楚隱王陳涉至西楚項羽亡爲秦楚之際凡五年

〔秦二世元年七月〕〔楚〕楚隱王陳涉起兵入秦○按舊本諸國始立索隱各續後事皆表所有故不載按汪越所訂本表於秦隱各續後事之文多刪去故此云然

〔秦二世二年後九月〕〔齊〕齊救假乃出兵項羽怒田榮○按列傳榮使楚殺假乃肯出兵楚不聽此云救假誤按殿本史記正作楚殺假乃出兵不誤汪越作齊救假不知據何本

〔義帝元年二月〕〔西楚霸王〕按舊本此下索隱所引漢書云一月及應劭之說無所取義故不載

讀秦楚之際月表

讀秦楚之際月表以漢爲主六國表末已書天下屬漢明正統也

索隱云張晏曰時天下未定參錯變易不可以年紀故別其月按秦楚之際擾攘僭篡運數又促故以月記事而名表也

冠秦于上非尊秦也天下共苦秦欲亡之而漢受命猶後必起秦而次及義帝至義帝爲項羽所殺闕不書帝號凡四十有一月者天下未一也至漢五年殺項籍天下平諸侯臣屬漢二月

王更號卽皇帝位然後大統有歸太史公全注意在漢漢書異姓諸侯王表序亦云據漢受命諸王十八月而列之天下統一統週以年數

沛公入咸陽卽表曰漢元年何也子嬰已降秦亡矣約法三章秦民大悅惟恐沛公不王是漢之受命有天下決諸此也周赧王卒東西周亡而太史公不遽予秦必待六王畢而後許秦代周漢之代秦進之何速蓋特筆也

讀秦楚之際月表當續六國表觀其時勢秦亡形已成六國滅而復起然齊三田韓成之外皆非六國後也特以六國爲名耳項梁立懷王羽尊之爲義帝欲以義帝爲名也且漢亦豈終臣義帝者哉羽殺義帝自假漢以出師之名也初懷王封羽爲次將屬宋義封沛公爲武安侯將碭郡兵楚漢雌雄始湊于此而有先入關者王之約當是時諸侯受秦兵則相救各路地以自廣志未嘗不在天下也鉅鹿之戰楚兵威震天下諸侯皆倚楚爲勦然最先入能亡秦者沛公也沛公入關子嬰降秦苛法還軍霸上待諸侯項羽入關誅子嬰除秦苛法還軍霸上燒咸陽諸侯未嘗心服而主命分王帖然聽之者徒以挾義帝爲名也太史公月表進漢元年于入秦之初夫入秦之月猶未有漢而表漢元年于此又二月項羽入秦又一月始尊懷王爲義帝元年沛公始入漢中都南鄭然則先後將抵軼歟曰不然也天下不可一日無主故秦亡則進漢以明有統此太史公微意在筆墨隱徑之外者顧史以記實而是時主命分王者西楚

也挾義帝以爲名則即以其名奉之非諸侯之得已也夫空名何啻弁髦然不可以假借義無予西楚故寧予義帝予義帝猶曰空名若予西楚則何名乎且帝王舉動必以其正漢誠有天下何必汲汲自王乎故表漢于十八王之中者謂紀時事之實且以戒後之人以數州土而盜名字者

諸侯起皆自王必皆各有元年而太史公但云秦楚之際月表以正朔爲天子有天下所布今諸侯各自王行于其所割據之地而巳故不許其元而以月表其義例嚴矣惟秦未亡之先則記二世元年義帝諸侯所共立則記義帝元年實則惟漢元年爲此表之主也

班固異姓諸侯王表冠漢元年下列諸國不書義帝尊漢也漢書一朝之體司馬遷作此表進漢元年于入秦之初而王漢中必書義帝元年以爲非一代之書不得不詳其實也

嘗疑月表中諸侯亦有記年者何蓋其就國之年亦未嘗表元年也如西楚霸王二年一月同時有衡山王吳芮二年一月九江王英布二年一月關中雍王章邯二年一月燕王臧荼二年一月一也西楚三年一月同時有衡山王三年一月燕王三年一月二也項羽誅韓成立鄭昌漢立韓王信信從漢伐楚故韓王信有二年一月三年一月三也西楚四年一月同時有衡山四年一月燕四年一月四也韓王信有四年一月五也漢立趙王張耳有二年一月六也項籍誅後燕有五年一月七也九江王英布身降漢

地屬項籍漢立爲淮南王籍誅後淮南有二年一月八也漢徙韓王信爲代王有五年一月九也自義帝元年十八王就封以來各自紀其年耳意亦別有據依太史公問存之而未創與然諸國之年參錯不齊因其就國之先後非天下一統之正朔故不得而盡同也

秦以建亥爲歲首凡言一月端月正月者皆十月也漢至武帝建初元年始用夏正

表言秦楚之際不言秦漢之際者秦無道天下共亡之漢固滅秦不得獨言秦漢之際也西楚雖主命分王諸侯與漢爭天下而漢踣之然漢得天下于秦及趙齊燕韓魏非第得之于楚也且楚與項固非一也陳涉初起王楚葛嬰立襄疆亦王楚秦嘉立景駒亦王楚至項梁求懷王孫于民間亦立以爲懷王王楚其後楚漢相爭惟榮陽成皋垓下諸大戰乃獨項氏耳故亦不得獨言楚漢之際也

二世元年同起兵者楚其一也次項次趙次齊次乃漢次燕次魏次韓凡八國而十三其姓表首列于下冠以秦年而諸侯不年者無統也積之至秦亡有八月者十六月者十八月者二十月者二十五月者二十九月者各參錯不齊也義帝元年同就封者凡十有八楚分爲四西楚其一也次衡山臨江九江也趙更名常山分爲代是二也齊分爲三臨淄濟北膠東也關中分爲四漢其一也餘則雍塞翟也燕分爲遼東是二也西魏分爲殷韓分爲河南亦皆二也表列其始封姓名而曰故某王故某將故某官又曰

都某地至漢誅籍即皇帝位于定陶諸侯略盡其月亦各參錯不齊也今合爲一表歷歷指掌分明此特創于子長爲後來史家法

茅坤曰讀秦楚月表海內土崩鼎沸之始末甚矣其可累歎太息也而彼真人者翱翔其間一切撥亂世反之正若轉圜然豈非神武而聖者乎按此語極得太史公尊漢之旨

索隱云趙歇前爲趙已二十六月今徙王代之二月故云二十七九月其膠東市之前爲齊三十九月韓廣魏豹韓成三人並先爲王已經多月故因舊月而載按此知月表但以月爲主不編年也韓廣三十一月魏豹十九月韓成二十二月通前積月計之餘皆以受封就國之第二月起不數舊月也凡表諸國前從楚入秦後從漢伐楚蓋諸侯向背之機漢取天下善因而用之此高祖五年以前天下之大勢也

#### 讀秦楚之際月表補

從來紀年必以正朔如秦以十月爲正朔每起十月訖九月以成一歲楚懷王之立在二世二年六月乃不依秦月而以一月起數過十二月復起懷王二年九月立爲義帝其一歲之月未週即紀元年起月是不復有正朔矣故諸國俱以始事之月起數其十八王雖同時封而趙歇田市韓廣魏豹韓成及漢王仍累前月不同義帝即其同者義帝既滅之後猶各紀年月蓋以非正朔故不共遵故謂之月表惟漢適當秦之十月至霸上子嬰降始稱元年遂依秦曆十月爲歲首以九月爲尾以後九月爲閏至五年成

帝于是正朔乃一

既以子嬰降書漢元年又大書義帝元年于秦後者義帝固楚漢諸侯所共立受命者書漢元年者明漢興所由始書義帝元年者明漢猶未成乎帝也漢至五年即帝位不更起元固以初破秦爲元年表亦錄其實耳非故進之也

秦表端月或云即秦正十月非也秦以建亥爲歲首仍稱十月未嘗以十月爲正月也故表紀年從十月起歷十一月十二月乃有端月則端月爲正月非十月也又按陳涉世家臘月陳王之汝陰其御莊賈殺以降秦張晏曰秦之臘月夏之九月瓚曰建丑之月也索隱曰按月表二世十月誅葛嬰十一月周文死十二月陳涉死瓚說爲是據張晏所云則易月據瓚索隱則不易月胡氏隱元年春王正月傳有不易月不易時之說蔡氏商元祀十有二月傳云三代雖正朔不同然皆以寅月起數歷舉詩四月維夏六月徂暑及秦十二月更名臘曰嘉平爲證朱子註孟子七八月云夏之五六月綱目紀秦皇及漢太初以前事又皆從冬十月起故先儒或云改時改月或云改月不改時或云時月俱不改紛紛未有定論愚按商書云爰革夏正夫夏正寅也商革之則商正月建丑可知若元祀十有二月孔氏云湯崩踰月太甲卽位爲建子之月商禮制未備不得據周禮踰年改元例之孔氏之言未可爲非詩所云四月維夏六月徂暑則漢書律曆志所謂言曆者仍以夏月是也故左傳卜偃言號滅在九月十月之交晉滅號在冬

十二月丙子周十二月固夏之十月又申須曰火出于夏爲三月于商爲四月于周爲五月又魯僖公五年春王正月辛亥朔日南至漢書律曆志載魯諸公冬至俱春正月冬至在十一月此一定者繫之正月其爲改月明矣至胡氏謂周建子非春夫子以夏時冠周月尤非朱子云正爲建子稱春不順故欲改從建寅耳如胡氏說則周改月不改時夫子何不云行夏之月而云行夏之時耶是商周時月俱改無可疑者獨秦以建亥爲歲首其書始建國曰元年冬十月夫十月建亥夏月也周十月建酉秦雖繼周不仍周月而用夏月但歲首不以建寅耳不得據秦以例商周漢初仍秦舊武帝太初元年夏五月造太初曆始以春正月建寅爲歲首

楚項一耳特分書之者楚始陳涉繼景句繼懷王項故楚將既立懷王又不奉命故別項于楚義帝既亡乃稱項爲楚也

立義帝者項氏書諸侯尊懷王爲義帝衆所奉不與項氏之得立也徙義帝于郴者項氏書徙都江南郴若帝自徙然者不與項氏之得徙也書項羽滅義帝等篡弑也

月表所載大都諸國戰爭興滅之事獨漢二年六月書立太子或以爲首建國本知所先務非也是時漢敗彭城楚取漢王父母妻子置之軍中漢王使人求家室獨得孝惠立爲太子太子固當立獨不念太公乎何亟亟于此書非予其能知本也譏忘親也

下而幾戮其親敵蹤之義謂何豈逆知項伯能解止之乎分羹之語今不忍入于耳也

存疑

史公記事必簡而明不應作歇後語如周苛之入楚也因楚下榮陽生得周苛項王以上將啖之苛罵項王不屈王怒烹之入楚下疑闕烹之字

漢四年四月書王出榮陽豹死未審豹爲何人若云魏豹三年八月已書周苛縱公殺豹或以此誤耶



讀史記十表卷之五

漢興以來諸侯年表第五

〔高祖六年〕〔代〕 初王喜元年○按喜高祖兄

〔高祖六年〕〔長沙〕 成王臣元年○按吳芮子

〔高后二年〕〔呂〕 十一月癸亥王呂嘉元年嘉

肅王子○肅呂台諡

〔高后八年〕〔呂〕 按呂后紀更名呂曰濟川呂

后崩後徙太王梁尋與常山淮陽皆以非惠帝

子誅

〔孝文二年〕〔梁〕 二月乙卯初王懷王勝元年

勝文帝子○按漢書勝作緡

〔孝文三年〕〔長沙〕 靖王著元年○按著漢書

作羌嗣立在二年

〔孝文四年〕〔濟北〕 爲郡○按世家濟北王反

誅地入于漢

〔孝景四年〕 四月乙巳立太子○按名榮母栗

姬因謂之栗太子

〔孝景四年〕〔膠東〕 四月乙巳初王元年是爲

孝武帝○按名徹不書諱也

〔孝景七年〕 十一月乙丑太子廢○廢爲臨江

王

〔孝武建元五年〕〔梁〕 平王襄元年○按恭王

子

〔孝武元朔元年〕〔長沙〕 康王庸元年○按康

漢書作載

〔孝武元鼎三年〕〔清河〕 薨子爲王○按名勃

坐罪廢

讀漢興以來諸侯年表

蔡邕曰漢制皇子封王其實諸侯也周末諸侯或稱王而漢天子自以皇帝爲號故以王名者總諸侯也

讀諸侯年表以天子爲主

冠漢帝紀年于上尊天子也下紀諸侯之事書

始封國名都某地某年封某後或反誅或有罪

自殺國除或徙王或廢爲侯或無後國除皆書

繼世者書王某元年遂以次紀年必表來朝者

明不失臣節也

有自王爲帝者文帝之于代武帝之于膠東也

按膠東齊悼惠王子雄渠反誅景帝四年王子徹于膠東是

爲孝武帝然孝武稱諡後人所加觀自序云作今上本紀稱

今上者子長文也 有自太子廢爲王者景帝太子

之爲閔王封于臨是也

高后之時自王而爲帝者少帝義由常山王立

常山始哀王不疑少帝入立改封軹侯朝淮陽

封懷王疆皆非眞惠帝子表紀時事亦不能竟

沒之也漢書無惠帝子王者削之也

有同姓國廢而改封異姓者高后之王諸呂非

漢制也有異姓國廢而改封同姓者長沙始吳

芮無後改封定王發景帝子魯始張偃後爲恭

王餘亦景帝子是也

表列同姓九國而異姓獨長沙吳芮然楚始韓

信淮南始英布燕始盧綰趙始張耳梁始彭越

代始韓王信皆異姓也 見秦楚之際月表漢書見異

姓諸侯王表蓋漢得天下初封功臣楚爲大梁次

之淮南又次之趙又次之燕代爲弱高祖心害

六王之能叛漢也裂土而畀之初非得已至于

夷滅皆盡而以樹同姓遂仍其故不虞復爲異日之患也太史公以其懲秦孤立封建過制故以周初封國及厲幽之後言之

太史公序形勢二字其主意也侯國強則王室

弱侯國弱則王室強故于諸國先言其疆域之

大又言漢所有僅自三河至于內史此形勢在

侯國也後言推恩分子弟國邑歷舉諸國分裂

之數與天子支庶王子支庶尊卑之等其支郡

山海咸納于漢與漢郡錯諸侯間此形勢在王

室也一篇之中反覆照應而結之以仁義爲本

與周之親親尊尊勞同道封建所以公天下其義

自見

秦罷侯置守分天下爲三十六郡蓋懲周末諸

侯遂廢封建漢復懲秦孤立而封建同姓錯處

郡縣間諸侯反者數起何哉無制故也陳仁子

曰國大則賦多賦多則兵強其爲亂也易國小

則賦微賦微則兵寡其爲亂也難古制公侯百

里伯七十里子男五十里不能五十里者附于

諸侯曰附庸如此則國小變遷猶未至吳楚之

亂近在目睫也按以勢論此言近之矣然漢高

猜忌功臣誅鋤異姓而七國之禍乃在宗親故

曰形勢雖彊要以仁義爲本

衆建諸侯而少其力此賈誼之策以之干文帝

者至景帝用鼂錯謀削七國山東諸侯皆反武

帝用主父偃之說使推恩子弟分其國邑乃不

削奪而自析矣然班固固言抑損諸侯滅黜其

官惟得衣食租稅不與政事至哀平之際皆繼

體苗裔親屬疎遠不爲士民所尊王莽知漢中

外殫微本末俱弱無所忌憚生其姦心顯作威福詐謀既成遂據南面之尊分遣五威之使馳傳天下班行符命漢諸侯王厥角稽首奉上尊轍惟恐在後或迺稱美頌德以求容媚豈不哀哉夫秦滅古法內無骨肉根本之輔外無尺土藩翼之衛漢矯枉過正藩國大者夸州兼郡宮室百官同制京師始嘗患宗室之過強至于其後又患在宗室之過弱讀此表者必通王子侯年表考之而漢一代封建之制利害乃盡矣

### 讀漢興以來諸侯年表補

諸侯年表自高祖六年而後王者皆劉氏耳其初封韓信英布張耳彭越韓王信吳芮盧綰七王已繫之月表不直削仍列于前者月表訖高祖五年未及載諸國誅廢而長沙獨存亦不得俱沒也且建國之始本以功大故王天下既定隨以事誅報功之地盡樹同姓末年令非劉氏不王豈先王親賢並建天下爲公之意乎表以功封敘起暨于同姓廢置之間觀者可爲太息也

序言天子觀于上古推恩子弟索隱曰武帝用主父偃言下推恩之令按文帝六年用賈誼策已有衆建之事所云齊分爲七趙爲六梁爲五淮南分三皆在文景時此天子亦統言不必專指武帝也

趙隱王如意書死燕靈王建書絕趙幽王友書幽死趙共王恢書自殺不言其所由死深痛之也四王事史不各載統入呂后本紀中甚后惡也

表特詳國都廢置封爵遷除不紀時事以將相表有大事記也來朝悉書者親親之情尊君之義所當然也

凡言反誅反自殺者雖其自取亦上過也如孝文固解寬仁而濟北王興居之反亦非無由初大臣誅呂氏時朱虛侯章功尤大許盡以趙地王朱虛盡以梁地王東牟及孝文入立聞朱虛東牟初欲立齊王故絀其功及二年王諸子僅割齊二郡以王章與居章與居自以失職奪功章死而與居遂乘匈奴之變反于濟北此由帝一念之私所召致也淮南厲王之反雖其凶橫性成亦帝縱使之過瞽瞍殺人皋陶執之豈有執天下正法而恣容一弟乎又重自切責乃使舅薄昭爲書以戒之彼凶橫者其何能降心也是速之亂耳斗粟尺布之謠當時必非無謂至景帝七國之亂更無論矣

高帝四年立太子不書文帝元年立太子不書獨景帝四年書立太子七年書太子廢讖之也太子榮不聞失德徒以嚙栗姬故聽長公主之譖輕易國本故是表于反誅外凡以罪廢者不詳其罪名獨書臨江王坐侵廟壩垣爲宮自殺夫壩垣廟境外之墟邊也罪亦細矣何遽使中尉簿責蹙令自殺耶方太子之被徵也祖江陵北門江陵父老俱流涕是必有以感人者帝奈何立之而廢之而殺之史稱帝刻薄信哉

### 存疑

表太初二年泗水思王商薨子哀王安世嗣即戴王賀元年安世弟按漢書安世立一年薨亡

後太初三年戴王賀以思王子紹封史五宗世家哀王安世立十一年卒無子上憐泗水王絕乃立安世弟所云安世嗣立之年俱與表不符賀爲思王子安世弟則同索隱曰賀廣川惠王子此誤也蓋以廣川惠王孫戴文王訛耳

讀史記十表卷之六

高祖功臣年表第六

〔序〕 帝王者各殊禮而異務要以成功爲統紀豈可緼乎○牟遠曰此數語無註蓋不敢斥言漢家少恩故爲隱語也

〔平陽〕 以中涓從○師古曰中涓親近之臣若謁者舍人之類涓潔也主居中涓潔也

〔信武〕 後元三年侯亭坐事國人過律奪侯國除○按事役使之也

〔廣嚴〕 索隱曰晉書地道記廣縣在東莞嚴諡也下又云班馬二史並誤○按此據漢表

〔留〕 以廐將從起下邳以韓申徒下韓國言上張旗志秦王恐降解上與項羽之郤爲漢王請漢中地常計謀平天下侯萬戶○按申徒卽司徒志當作幟

〔鄼〕 索隱曰鄼音贊縣名在沛○按諸家解作南陽鄼

〔梁鄼〕 元光四年侯山柑元年○師古曰柑音平

〔蓼〕 以執盾前元年從起碭○師古曰前元年謂胡亥元年

〔棘蒲〕 以將軍前元年率將二千五百人起薛別救東阿至霸上二歲十月入漢擊齊歷下軍田旣功侯○按軍田旣功漢表作軍臨菑

〔魏其〕 六年六月丁亥莊侯周定元年○按漢表作周止

〔平〕 六年六月丁亥悼侯沛嘉元年○按沛嘉漢表作工師喜

〔棘丘〕 索隱曰襄名也史失姓及諡○牟遠曰侯失國本無諡非失之也

〔北平〕 爲計相四歲○按計相官名〔厭次〕 以慎將○師古曰以謹慎爲將也

〔汾陽〕 四十二絕○按漢表云不得狀〔高陵〕 十二年十一月丁亥圉侯王周元年○按漢表王虞人

〔成陽〕 十二年正月乙酉定侯意元年○按姓奚

讀高祖功臣年表

讀功臣年表以侯功爲主按漢書高祖八年天下平論功定封訖十二年侯者百四十有三人又作十八侯位次高后二年詔丞相陳平盡差列侯之功錄第下竟藏諸宗廟副在有司太史公所表侯第是也

韋昭曰漢封功臣大者王小者侯也

按功臣封王在高帝四年五年間是時天下初定如韓彭等不得不王之耳自六年以後漢約非劉氏不王非軍功不侯

索隱曰漢書音義云曹參功第二而表在首蕭何功第一而表在十三者以封有先後故也

索隱曰封參在六年十二月封何在六年正月高祖十月因秦改元故十二月在正月前也

表侯功大約從起豐沛從至霸上定秦從至漢中從滅項羽功之大者也餘功如從大將擊齊魏擊趙韓燕代定諸侯如護太公呂后如奉孝惠魯元公主如解鴻門如爲漢守如從擊黥布彭越陳豨盧縮韓王信等皆表而出之明不與

恩澤侯同也

凡有罪失侯者大約如耐金如爲太常犧牲不如令如爲太常酒酸罪之輕者也餘罪如爲太守知民不用赤仄錢爲賦如不償人責如尙南宮公主不敬如出入屬車間如坐出界如買塞外禁物如入上林謀盜鹿如爲太常與樂舞人闌入函谷關如賣宅縣官故貴猶皆在可議之列也餘重罪則謀爲大逆大不敬過律姦淫略人傷人總之所謂不奉上法者也或但云有罪疑獄也不明所坐或史闕之

按太史序曰漢興功臣受封者百有餘人至太初百年之間見侯五餘皆坐法隕命亡國嘆不能副河山帶礪之誓而苗裔衰微也今第追錄侯功謂察其首封所以得尊寵而各書罪狀國所自除則所以失之而致廢辱者責在下矣故曰當世得失之林也然本其先天下初定大都名郡戶口散亡漸以益息乃至富厚未幾子孫驕溢不能篤于仁義奉上法以自取戾而首稱功有五品以深致歎歎之意且夫協和萬國遷于夏商或數千歲何古者封建之澤長而今茲之促也惜哉其罪累上毋亦使人謂漢法之過嚴乎

此下四表皆國經而年緯凡標國名侯功于端以貫其下者縱也標高祖孝惠高后孝文孝景與建元至太初已後準王朝曆數以紀諸侯之年者衡也前十二諸侯年表以下皆年經而國緯故冠帝年于端體各不同也何謂準王朝曆數定諸侯之年如表首平陽侯